

# Katika Umilele



## SABATO MCHANA

**Somo la Juma Hili:** *Zaburi 80, 1 The. 4:17, Ufu. 21:9-27, Isa. 25:8, Ufu. 7:17, Ufu. 21:4, Yn. 6:44.*

**Fungu la Kukariri:** “Wapenzi, sasa tu wana wa Mungu, wala haijadhihirika bado tutakavyokuwa; lakini twajua ya kuwa atakapodhihirishwa, tutafanana naye; kwa maana tutamwona kama alivyo” (1 Yoh. 3:2).

**W**akati ujao una nini kwa ajili yako? Ni kitu gani kipo huko mbele? Unaweza kuwa wa kutisha, wa kusisimua, wa kuogofya, na wa kushangaza, vyote kwa wakati mmoja. Jua kwamba Bwana Yesu ni mwaminifu na kwamba maneno Yake ni ya kweli (Ufu. 3:14). Bado zitakuwepo siku za dhoruba hapo mbele (Mt. 24:21, 22), lakini ameahidi kwamba kamwe hatakupungukia kabisa, wala kukuacha (Ebr. 13:5). Yeye atatenda hakika kile alichosema atakitenda – daima ametenda Naye daima atatenda (Ebr. 10:23). “Lakini mwenye kuvumilia hata mwisho, ndiye atakayeokoka” (Mt. 24:13).

Bila kujali idadi ya siku tulizobakiza duniani, yatupasa tukaze macho yetu kwa Yesu, tukidumu bila kuchoka kumtazama Yeye. Hili sio rahisi siku zote katika ulimwengu unaong’ang’ania kusikilizwa, lakini hebu sisi, kama Daudi, tuseme, “Macho yangu humwelekea Bwana daima, Naye atanitoa miguu yangu katika wavu” (Zab. 25:15).

Juma hili, hebu tujifunze kuhusu zawadi ya mbinguni (Mt. 5:12; Ufu. 22:12); jinsi mbinguni patakavyokuwa; na hatimaye, itakavyopendeza kuwa pamoja na Yeye aliyetuumba, aliyetupenda hadi mauti, ambaye ametukomboia kutoka katika dhambi, Naye anakuja tena upesi. Inatupasa kushikilia kile tulicho nacho kwa Imani hadi wakati huo.

*\*Jifunze somo la juma hili kwa maandalizi ya Sabato ya Juni 27.*

## Kuishi Leo

Tunapotazama pande zote, tunaona ulimwengu ukitetemeka na kuugua, na ishara alizotuambia Yesu zinatimilika mbele ya macho yetu. Vita na uvumi wa vita, mataifa yanayoinuka dhidi ya mataifa mengine, njaa, matetemeko ya ardhi, na mateso (*Mt. 24:6-11*) yanatokea kote kote na yanaonekana tu kuzidi kadiri wakati unavyosonga. Ndiyo, tunaishi katika nyakati ngumu—nyakati tunapohitaji uhusiano wa kudumu pamoja na Mungu.

Tunaambiwa, “Lakini mwisho wa mambo yote umekaribia; basi, iweni na akili, mkeshe katika sala” (*1 Pet. 4:7*). Ikiwa ni hivyo basi, tena zaidi sana sasa ni wakati wa kuimarisha na kuthibitisha uhusiano wako binafsi na Mungu. Na bila kujali ni muda gani unapita, maisha yetu binafsi siku zote ni mafupi, haidhuru tunaishi kwa muda gani. “Haya basi, ninyi msemao, ‘Leo au kesho tutaingia katika mji fulani na kukaa humo mwaka mzima, na kufanya biashara na kupata faida,’ walakini hamjui yatakayokuwako kesho. Uzima wenu ni nini? Maana ninyi ni mvuke uonekanao kwa kitambo, kisha hutoweka” (*Yakobo 4:13, 14*). Tunajua jinsi onyo hilo lilivyo la kweli. Baadhi yenu mnaosoma maneno haya sasa hivi huenda msiwe hai siku hii itakapokuwa ikiisha. Hii ni sehemu ya ukweli wa kusikitisha wa kuishi katika ulimwengu ulioanguka dhambini. Ni muhimu jinsi gani, basi, kuhakikisha uhusiano wetu na Mungu na kuishi daima katika utambuizi wa uhitaji wetu kwake na neema yake inayookoa?

**Zaburi** 80 inatoa wito mzuri kwa Mungu. Isome zaburi hii na kwa namna ya pekee, tafakari aya ya 1-3, 14-17, 18, 19 na uweke neno “mimi” badala ya “sisi” (au “nasi”). Hata iwe tofauti kubwa kiasi gani ya muda, mahali na muktadha wa zaburi hii, ni kwa njia gani unaweza kuhusiana nayo wewe binafsi?

Sisi sote tunahitaji uamsho maishani mwetu. Ni rahisi sana kuridhika au hata kuwa na usahaulifu wa kile ambacho Mungu ametutendea na anatutendea. Ni muumini gani mwaminifu, hata kama anasumbuka na udhaifu fulani, asiyeweza kuomba kama hivi: “Uangazishe uso wako nasi tutaokoka!” (*Zab. 80:19*)? Unapokubali kile ambacho Bwana Yesu amekutendea, unapojua kwamba dhambi zako zimesamehewa na kwamba umefunikwa na haki Yake kamilifu, ambayo inahesabiwa kwako kwa njia ya imani, utajua kwamba unaokolewa katika Yeye.

Unaelewaje maana ya Mungu “kuangazia” uso Wake juu yako, hususan katika muktadha wa kujua kwamba haki Yake pekee ndiyo inayokuokoa?



## Hatimaye, Ana kwa Ana

Tuliombwa tuwe karibu na Mungu (*Mwa. 2:7*). Tangu alipoumba jamii ya wanadamu, Mungu ametoa kila kitu ili kurejesha uhusiano ulioyujika kati yetu na Yeye (*Yn. 3:16*). Ameweka milele ndani ya mioyo yetu, licha ya hivyo wanadamu hawawezi kuelewa kile Mungu alichofanya tangu mwanzo hadi mwisho (*Omb. 3:11*). Sisi ni sehemu ya pambano kuu linalozidi kote kutuzunguka – hata ndani yetu – hata hivyo, mara nyingi huwa hatutulii kiasi cha kutosha kutafakari gharama kubwa ya kile ambacho kimetolewa ili tupate kurejeshwa kwenye uhusiano ambao Mungu ameukusudia kwamba sisi tuwe nao pamoja Naye. Mara nyingi sana, tunajikuta tukiwa tumezingwa katika mapambano na majaribu yetu ya kidunia, tukisahau kwamba “wenyeji wetu uko mbinguni; kutoka huko tena tunamtazamia Mwokozi, Bwana Yesu Kristo” (*Flp. 3:20,21*).

Ulimwengu unapoporomoka ukikaribia mwisho, tunajua kwamba wingu dogo jeusi, siku moja litatokea kwenye anga la mashariki. Litakapokuwa likisogea karibu zaidi na zaidi, tutaona kwamba kwenye wingu lile atakuwa “ameketi mmoja, mfano wa Mwanadamu, mwenye taji ya dhahabu juu ya kichwa chake, na katika mkono wake mundu mkali” (*Ufu. 14:14*). Bwana Yesu atasindikizwa na maelfu kwa maelfu ya malaika (*Mt. 25:31*), na kila jicho litamwona (*Ufu. 1:7*). Atakapokuwa akishuka, tutasikia kelele yake, mwito wa tarumbeta ya Mungu, na makaburi ya wale waliolala katika Kristo yatafunguka watakapokuwa wakiinuka kwanza (*1 The 4:16*). Watajua sauti Yake atakayekuwa akiwaita (*Yn. 5:28*).

**Ni** jambo gani litalalotoka baada ya hapo? Soma 1 Wathesalonike 4:17. Hatimaye, kile Mtume Paulo anachokiandika kwenye Wafilipi 2:10, 11 kitakuwa ni mwangwi kwenye ulimwengu wote.

Ni wazo zuri la kushangaza kiasi gani! Siku moja tutamwona Bwana Yesu – kweli kweli, tutamwona Yeye. Tutaisikia sauti Yake, nasi tutakiri kwamba Yeye ni Bwana. Yeye ambaye tumesoma habari zake, ambaye tumekuwa tukimwomba, ambaye tumekuwa tukimzungumza kwa wengine; Yeye ambaye mioyo yetu imekuwa na shauku juu yake... Kwa kweli tutamwona uso kwa uso. Tunaweza kuwa na uhakika juu ya hili, kwani Mungu ni mwaminifu na ahadi Zake ni za kweli (*Ufu. 22:6*).

Wakati huo, pale tarumbeta itakapolia na jicho la kila mtu litakapomwona Yesu, tutajua kwamba kusubiri kwetu kumekuwa kwa maana. Kila ombi la uvumilivu, kila fursa ambayo tumeipa kipaumbele ya kuwa Naye, kila muda ambao tumeutumia kunena kwa ujasiri kwa ajili Yake, kila jaribu – litahitimishwa kwa kuuona uso Wake (*Ufu. 22:4*).

## Bibi Harusi

Akiwa uhamishoni kwenye kisiwa cha Patmos, mwanafunzi Yohana alioneshwa njozi ya jinsi itakavyokuwa tutakapounganishwa na Mungu milele.

**Soma** Ufunuo 21:9–11. Ni ulinganifu gani uliotolewa, na unadhani ni kwa nini ulitumiwa?

Bibi harusi huwa ni mrembo, na kwenye siku yake ya harusi, kila mmoja anataka amwone. Siku ya harusi ni wakati muhimu wa maisha mapya ya pamoja ya bwana na bibi harusi, na hili litakuwa ni kweli pia kuhusu uhusiano na Mungu wakati arudipo.

Yesu amekuwa akituandalia mahali (*Yn. 14:1–3*), mahali pazuri ambapo panashangaza sana kuliko tuwezavyo kueleza. Kwa kweli, “Lugha ya kibinadamu haitoshi kueleza zawadi ya wenye haki. Itaeleweka tu kwa wale watakaonia. Hakuna akili yenye kikomo inayoweza kuelewa utukufu wa Paradiso ya Mungu.” – Ellen G. White, *Pambano Kuu*, uk. 556.

Ingawa hatuwezi kuelewa kikamilifu vile mbingu mpya na nchi mpya itakavyokuwa, Mungu anamuonesha Yohana njozi ya mahali hapa ili tupate kuishi tukitazamia kwa shauku ile “harusi” ambayo itakuwa hivi karibuni. Kwa kweli, tumealikwa kufikiri “yaliyo juu, siyo yaliyo katika nchi” (*Kol. 3:2*).

Mungu anaandaa tukio hili kwa uangalifu sana, Naye hataki hii “harusi” kutujia kama jambo la kushtukiza (*Mt. 22:1–14; Mt. 25:1–13*).

Ulimwengu ni kusanyiko litakaloshuhudia pale tukio hili litakapokuwa, nasi ni baadhi ya walio muhimu sana kwenye kisa hiki. Tutaungana na “bibi harusi,” jiji hili ambalo Bwana Yesu atatupeleka kwalo akija mara ya pili. Jambo la kupendeza zaidi ni kwamba, watu wa Mungu (watakatifu) wanaitwa pia bibi harusi (*taz. Ufu. 19:7*), pengine kwa sababu wamo kwenye “mji ule mtakatifu, Yerusalemu mpya, ukishuka kutoka mbinguni kwa Mungu, umewekwa tayari, kama bibi-arusi aliyekwisha kupambwa kwa mumewe” (*Ufu. 21:2*).

Maelezo haya ya Jiji Takatifu yanaonesha kwamba kuna uhusiano wa karibu sana kati ya watu wa Mungu na lile jiji, kwa sababu vyote viwili vinaitwa “bibi harusi.” Biblia inadhihirisha maelezo ya kina ya “Mji Mtakatifu, Yerusalemu Mpya, ambao ni mji mkuu nao huwakilisha ufalme, na unaitwa ‘bibi arusi, mke wa Mwanakondoo.’” – Ellen G. White, *Pambano Kuu*, uk. 354.

**Soma** Ufunuo 21:9–27. Kwa nini ni jambo gumu hivi kwetu kulifikiria sasa? Tunawezaje hata kuanza ku weka mawazo yetu kwenye kile alichotuahidi kwenye aya hizi?



## Mfuata Mwana – Kondoo

Je, umepata kuulizwa kile unachokitarajia zaidi katika milele inayokuja? Mtoto anaweza kusema, “Kumpakia Chui,” “kuteleza kwenye shingo ya twiga,” au “Kupaa kwenda kwenye sayari mbalimbali.” Kama ungemwuliza kijana wa umri wa kupevuka, anaweza kusema, “kutokabwa na jukumu la kufanya kazi zaidi za nyumbani,” au Kuitalii mbingu nikiwa na marafiki zangu bila kuumizwa.” Na ikiwa ungewauliza kundi la watu wazima, wanaweza kusema, “Kuwa mahali ambapo hapatakuwa na maumivu tena, wala kuteseka, wala kifo,” au “kuunganishwa tena na wapendwa wetu.” Majibu haya yote ni mazuri na ya kweli, na yapo mengi sana ya kutarajia kuona kwenye mbingu mpya na nchi mpya. Milele huwa inawaka moto ndani ye mioyo yetu, na kwa namna iliyo halisi, tunajua kwamba lazima kuna kitu zaidi maishani kuliko wakati huu na sasa.

**Ni** baraka gani zingine tunazoweza kuzitarajia ziwepo katika milele? Soma Isaya 25:8; Ufunuo 7:17 na Ufunuo 21:4.

Kwa kweli baraka kubwa kuliko zote ya mbinguni hatimaye itakuwa kumwona Yesu na kumshukuru, kiuhalisia nafsi kwa nafsi, kwa kile ambacho ametufanyia kwenye dunia hii iliyoanguka dhambini. Tutataka kutoa kwa wingi zaidi sifa zetu na ibada kwake Yeye kwa kutuokoa na mauti ya milele, kwa kuteseka kwake binafsi msalabani.

“Astahili Mwana-Kondoo aliyechinjwa, kuupokea uweza na utajiri na hekima na nguvu na heshima na utukufu na baraka!” (Ufu. 5:12).

Yohana Mbatizaji alimtambulisha Yesu kama “Mwana – Kondoo wa Mungu” (Yn. 1:36). Wawili kati ya wanafunzi wawili wa Yohana alisikia kauli hii na kumfuata Yesu (Yn. 1:37), na Ufunuo 14:4 inatuambia kuwa inatupasa tufanye vivyo hivyo. “Hawa ndio wamfuatao Mwana-Kondoo kila aendako” (Ufu. 14:4). Hata hivyo, ikiwa tunataka tumfuata Yeye hadi mbinguni, sharti tumfuata Yeye kwanza hapa duniani.

Yesu, Mwana – Kondoo, ndiye pia Mchungaji wetu, akiongoza njia zetu kwa namna asivyoweza kufanya mwingine yeyote. Hili linatuthibitishia zaidi tunapopambana tukipitia kwenye nyakati zetu ngumu tunazojikuta, lakini Yesu kamwe hatakoma kutuongoza, hata mbinguni. Ufunuo 7:17 inasema, “Kwa maana huyo Mwana-Kondoo, aliye katikati ya kiti cha enzi, atawachunga, naye atawaongoza kwenye chemchemi za maji.” Kama watu wake, kondoo wake, tutamfuata Bwana Yesu mbinguni, milele tukitaka kuwa katika kuwepo kwake. Sifa moja inayowabainisha watu wa Mungu ni kwamba “Jina lake litakuwa katika vipaji vya nyuso zao” (Ufu. 22:4). Yaani, daima tutakuwa tukimfikira Yeye.

Sikiliza wimbo wa Kiadventista, “Follow the Lamb” (“Mfuata Mwana-Kondoo”) kwenye <https://vimeo.com/1067821589> kisha yatumie maneno ya wimbo yawe sala yako binafsi leo.

## “Njoo!”

Umepewa mwaliko tena leo: “Njoo.”

**Soma** aya zifuatazo na utambue zinavyokualika ili umjie Yeye: Mt. 11:28–30; Isa. 55:1–3; Yohana 6:44.

Roho Mtakatifu anataka kukuvuta kwa Yesu leo. Yesu anakualika uje Kwake, kukaa ndani Yake leo na kila siku, hadi atakapokuja. Wakati unapomwitikia na kumjia Yeye, wakati moyo wako ni laini na nia yako ikiwa imesalimishwa, utajisikia amani kwa sababu ya kujua kwamba atakuinua, licha ya jinsi unavyoweza kujisikia kutokufaa, katika siku ya mwisho wa dunia hii. Yesu alisema, “Ye yote ajaye kwangu sitamtupa nje kamwe” (Yohana 6:37).

Tunapaswa kuhisi umuhimu wa kufanya kazi na Roho Mtakatifu kuwaita wengine ili waingie katika uhusiano unaooko na Yesu. “Na Roho na Bibi-arusi wasema, Njoo! Naye asikiaye na aseme, Njoo! Naye mwenye kiu na aje; na yeye atakaye, na ayatwae maji ya uzima bure” (Ufu. 22:17).

Mwaliko ni bure, unaotolewa kama zawadi ya neema. Tunapomkubali maishani mwetu na kumpenda kwa mioyo yetu yote, akili zote, roho zetu na nguvu zetu zote (Kum. 6:5), maisha yetu hapa na ya wakati ujao yatabadilishwa milele.

Bwana Yesu anapotualika tumjie Yeye, maneno ya mwisho katika Biblia yanaahidi hivi: “Naam; naja upesi. Amina; na uje, Bwana Yesu.” (Ufu. 22:20, mkazo umeongezwa).

Upesi kiasi gani? Kwa mtazamo wetu, mara tu tunapofunga macho yetu tukifa, jambo linalofuata tunalojua litakuwa ni kurudi kwa Kristo. Tukizingatia jinsi maisha yetu yanavyopita upesi, ndivyo Yesu anavyorudia kwa upesi. Pengine wazo letu la kwanza tukifufuka litakuwa Wauu, Bwana, ujio wako umefika upesi sana!

Kwa kweli, sasa tunaona lakini kwa namna hafifu, kama kwenye kioo. Lakini wakati huo tutamwona ana kwa ana. Usichoke katika kusubiri. Dumisha uhai wa shauku hii daima mbele yako, kwa imani na katika tumaini katika upendo na wema wa Mungu. Bwana Yesu, tafadhali njoo upesi!

**Omba sasa hivi ili imani idumu, ili imani ikuruhusu kujisalimisha kikamilifu na bila kuacha chochote kwa Yeye aliyekufa kwa ajili yako na vilevile anarudi upesi kwa ajili yako.**



**Jifunze Zaidi:** “Kama hatuipokei dini ya Kristo kwa kujilisha katika Neno la Mungu, hatutastahili kuingia kwenye jiji la Mungu. Kwa kula chakula cha kidunia, kwa kujizoeza kupenda mionjo inayoongoza kupenda mambo ya kidunia, hatungefaa kwa nyua za kimbingu; hatungeweza kuthamini vitu vilivyo safi, mkondo wa kimbingu unaotawala mbinguni. Sauti za malaika na muziki wa vinubi usingeturidhisha. Sayansi ya mbinguni ingekuwa fumbo akilini mwetu. Yatupasa tuwe na njaa na kiu ya haki ya Kristo; inatupasa tufinyangwe na kutengenezwa na nguvu inayobadilisha ya neema Yake, ili tufae kuwa katika jamii ya malaika wa kimbingu....

“Kisha mataifa hayatakuwa na sheria nyingine isipokuwa sheria ya mbinguni. Wote watakuwa ni familia iliyo na furaha, yenye umoja, iliyovishwa mavazi ya sifa na shukrani... Katika mandhari hiyo, nyota za asubuhi zitaimba pamoja, na wana wa Mungu watapiga kelele za furaha, wakati Mungu na Kristo wataunganika katika kutangaza, ‘Dhambi haitakuwepo tena, wala mauti haitakuwepo tena.’

“Yapasa tuingie katika mazoea ya kupazungumzia mbinguni, mbinguni pazuri. Zungumzia yale maisha yatakayodumu kama Mungu anavyoishi, na kisha utasahau majaribu na matatizo yako madogo madogo. Hebu mawazo yavutiwa na Mungu.” Ellen G. White, *The Faith I Live By*, uk. 363.

## Maswali ya Kujadili:

- ① Kadiri uwezavyo kuyapata maandishi haya, sikiliza au soma njozi za mbinguni inayopatikana kwenye kitabu *Early Writings*, uk. 14–20. Ni jambo gani linalokugusa wewe zaidi katika maelezo haya?
- ② Ni sehemu gani ya masomo ya robo hii ambayo unataka sana kuyakumbuka ili kuimarisha uhusiano wako na Mungu hadi utakapomwona Yesu uso kwa uso?
- ③ Ni nani maishani mwako ambaye anahitaji kusikia juu ya tumaini la mbinguni? Wajibika kikamilifu katika kushiriki nao matumaini hayo haraka kadiri iwezekanavyo. Kumbuka: huwezi kushiriki nao tumaini ambalo wewe binafsi huna.

**Muhtasari:** Kadiri tunavyoweka macho yetu kwenye lengo, hebu tuweze kusema, “Nami niliaminilo ndilo hili, ya kwamba yeye aliyeanza kazi njema mioyoni mwenu ataimaliza hata siku ya Kristo Yesu” (Flp. 1:6). Mungu alianzisha uhusiano alio nao nawe, Naye ataukamilisha. Hebu na tukue katika upendo na katika imani tunapoisubiri siku ile, wakati tukidumu kupumzika katika haki ya Kristo, ambayo tunapewa tu kwa imani.